

Azizan dijangka keluar IJN esok
HarakahDaily
Ogos 15, 2011

KUALA LUMPUR, 15 Ogos: Setelah hampir tiga minggu berada di Institut Jantung Negara (IJN), Menteri Besar Kedah, Datuk Seri Azizan Razak dijangka akan keluar esok.

Menurut setiausaha akhbarinya, Helmi Khalid, Azizan dijangka dibenarkan keluar esok selepas mendapatkan rawatan dan berehat kira-kira tiga minggu bermula 27 Julai lalu.

Azizan ke IJN untuk pemeriksaan rutin biasa namun ditahan apabila didapati ada bahagian saluran jantungnya yang tersumbat.

Ekoran itu, beliau telah membuat prosedur angioplasti untuk membuka saluran yang tersumbat itu di samping berehat untuk menurunkan tekanan darahnya yang agak tinggi.

Setiausaha politiknya Muhammad Sanusi Md Nor berkata, Azizan yang sebelum ini berjaga sehingga jam 1 hingga 2 pagi, kini terpaksa tidur sejam atau sejam setengah selepas Maghrib.

"Kebelakangan ini dia tidur selepas Maghrib, hingga jam 9.30 atau 10.00 (malam), selepas itu baru dia memanggil saya ke rumah.

"Kalau tak panggil saya, dia akan maklumkan dia nak jumpa si polan si polan di rumah, semuanya berkaitan kerja.

"Keletihannya nampak sangat-sangat. Jam 12 baru selesai," kata Sanusi sebagaimana dilaporkan Malaysiakini.

Isu terakhir yang dihadapi Azizan adalah cadangan penutupan pusat hiburan sepanjang bulan Ramadhan di Kedah, namun ia dibantah oleh orang bukan Islam kerana ia akan menjejaskan kehidupan mereka.

Ekoran itu, persetujuan dicapai agar hanya umat Islam dilarang dari memasuki premis hiburan sepanjang bulan Ramadhan ini manakala pemilik premis akan memastikan ianya dilaksanakan.

Ekoran itu, baru-baru ini Setiausaha Kerajaan Negeri Kedah memaklumkan peraturan itu berjalan dengan baik dengan tidak ada laporan orang Islam memasukinya sepanjang bulan ini.

Copyright © 2010 Harakahdaily

Source: <http://bm.harakahdaily.net/index.php/berita-utama/4926-azizan-dijangka-keluar-ijn-esok>